

## Tantiago cadota ante nänö yewæmongainta

### *Tantiago ümai yewæmongacäimpa*

<sup>1</sup> Botö Tantiagobo iñömö Mæmpo Wængongui tönö mönö Awënë Itota Codito inate nē cædōmo imopa. Idægoidi mini cabo tipæmpoga go mencabomīniya inte wabæca nāni quēwencabo wabæca nāni quēwencabo weca pangocæte godimīni iñōminite botö waa pönēmo inte ii yewæmōintaa yewæmōmopa.

### *Wængongui nänö eñēmāmo ante mönō ængæimpa, ante*

<sup>2</sup> Botö tönīñamīni eñēedāni. Quiēmē beyæ wæwente bamīni incæ mīnitō æyedēmē mänōmaī bamīni īninque edæ māniñedē incæ cōwē, Mönō watapæ toquinque impa, ante pönēedāni. <sup>3</sup> Mīni wede pönēnō æbānō ī, ante edonque acæimpa, ante cædāni ate caate wæmīni incæte mīnitō, Mönō caate wædō beyænque mönō godōmenque pædinque wæntæye ināmaī inte ee cæquimō imopa, ante do eñēmīnīpa. <sup>4</sup> Īninque, Mönō æmæwo pæcæimpa, ante cædinque mīnitō wæntæye ināmaī inte ee cæedāni. Mänōmaī cæte pæmīni īninque, Mīni cædimāmo æbānō cæmīni imīnī, ante adinque edæ, Tömānō waēmō cæmīni imīnīpa, ante abaimpa.

<sup>5</sup> Mīnitō weca æcānō nänö eñēmāmo wīi eyepæ ina adinque tōmengä, Pönōmi eñēmoe, ante Wængongui ingante apænequēnengampa.

Apæneyongä Wængongui wæætë pönö cæcä æncæcäimpa. Edæ Wængongui iñömö nē, Pönömi æmoe, ante änongä ingante wæætë piinte änämaï inte godönongä ingampa. Ayæ tömänäni inänite pönö cædinque tömää godönongä ingampa. <sup>6</sup> Iñæmpa nē angä iñömö wede pönenguëngä inte wii æmæ pönëninque apænecæcäimpa. Edæ nē æmæ pönengä iñömö gäwapæ æpæ woboyæ pæmæninque mæ conta mæ conta gopæ ocæmæ pö cæpæ nänö cægaimæ bai tömengä adobai gocä ingampa. <sup>7</sup> Mäningä iñömö Wængongui pönongä æncæboimpa, ante ædö cæte iïmai ante pönenguingä. Wængongui edæ tömengä ingante tömää godönämaï incæcäimpa. <sup>8</sup> Tömengä mënongä pönente quëwengä ingampa. Æbänö cæcää, ante eñënämaï inongä inte ædö cæte waa cæquingä.

<sup>9</sup> Adocanque mönö tönïñacä incæ imæca quëwënäni nani ëadincoo nē wii eyepæ ëacä incæte tömengä Wængongui pönö cæcä beyænque, Æbänö ëaboo, ante pönëninque watapæ toquëngä ingampa. <sup>10</sup> Wacä mönö tönïñacä guiquënë imæca quëwënäni nani ëadincoo nē ëacä incæte tömengä wæætë, Botö önömoque imopa, ante pönëninque watapæ toquëngä ingampa. Edæ ongai önonque pododinqe guiñë wæmpa bai tömengä adobai wæncæcäimpa. <sup>11</sup> Edæ nænque tamö ti näwãñonte awæ guingo icate to aminte æmæwo wæmpa. Ongai yædoï gueo odote wæninqe nänö wæmöö ënodï wo ëwente bapa bai nē ëacä iñömö adobai ingampa. Tömengä godonte æ godonte æ tæcæ cædinque quingæ wæninqe edæ dæ anguingä.

*Mönö caate wæpämö*

12 Wængonguī ingante nē waadedāni inānite tōmengā wæætē, Mīni cōwē quēwenguinta, ante poganta bai mīnitō imīnite pōnōmo æncæmīnīmpa, ante angacāīmpa. Mānīnta Wængonguī weca cōwē mōnō quēwenguīnō īmpa. Īnīnque waocā caate wæcā incæte tōmengā wæntæye badāmaī ingā iñōmō tōmengā nānō toquinque. Wæntæye ināmaī inte ee cæcā adīnque Wængonguī, Mīni cōwē quēwenguinta, ante tōmengā nānō angainō bai māningā ingante pōnongā æncæcāīmpa. 13 Waocā nānō cæīnēwente wædō beyæ, Wēnæ wēnæ cæboe, ante cædīnque tōmengā, Wængonguī botō imote, Wēnæ wēnæ cæcæbiīmpa, ante ingampa, ante wīī anguēnengā ingampa. Edæ Wængonguī ingante, Wēnæ wēnæ cæcæbiīmpa, ante waocā ædō cæte anguingāā. Wængonguī wæætē wadāni inānite, Wēnæ wēnæ cæcæmīnīmpa, ante ānāmaī īnongā ingampa cæmīnīi. 14 Æcāmenque incæ, Wēnæ wēnæ botō cæīnente wædō incæ ante waēmō īmpa, ante pōnēnīnque tōmengā do wēnæ wēnæ mōnō cæīnente wædō beyænque wēnæ wēnæ cæīnengā ingampa. 15 Yædēmadā wēñængā pæcā adīnque ēñāquīngā bai mōnō cæīnēwente wæpāmo adobāī entawente pætawēmō īnīnque mōnō do wēnæ wēnæ cæmōmpa. Ayæ wēnæ wēnæ mōnō cæpāmo beyæ mōnō æmæwo wænguīnque īmpa.

16 Botō nē waadete tōnīñamīni ēñēedāni. Mīnitō nāmā incæ oda cædāmaī incæmīnīmpa. 17 Ōnonque mōnō ænō ante mōnō waēmō ñāō ēmōnoncoo tōmancoo incæ mōnō Mæmpo Wængonguī oōnædē owote nē pōnōnongā ingampa. Mæmpo Wængonguī oōnædē owodīnque apāīdāni īnāni badongacāīmpa. Adocā nænque wēmō cæbaī wayōmō wayōmō go

baī entawēnāmaingā ingampa. Tōmengā wæætē adodonque ingaingā ingampa. <sup>18</sup> Botō cæinēmopa, ante nē angaingā inte Wængonguī, Nāwangā botō angainō beyænque mīnitō botō wēñæmīni bacæmīnimpa, ante wäänā mangā baī cædinque mōnō imonte pōnō badongacāimpa. Tōmengā nānō badongaincoo tōmancoo iñonte mōnō tānomō inōmō imōmpa.

*Wængonguī ingante mōnō nō ēñente cædō*

<sup>19</sup> Botō nē waadete tōniñamīni ēñeedāni. Wacā āñongā mīnitō tōmāmīni quingæ ēñenguēnēmīni imīnīpa. Mīnitō wæætē quingæ apænedāmaī inte adobaī quingæ pīinte ināmaī inguēnēmīni imīnīpa. <sup>20</sup> Wængonguī, Nō cæte quēwēedāni, ante waa nānō cæinēmāmo ante waocā nānō pīimāmo beyæ wīi edæ cæcampa. <sup>21</sup> Mānōmaī beyæ mīnitō wentamō entawēnīnque mīni wīwa cædō tōmāā ñimpo cæedāni. Adobaī quiēmē mīni wēnæ wēnæ cæpāmo tōmāmāmo ñimpo cæte iedāni. Ayæ Wængonguī nānō angainō ante mīnitō mīmōnē nānō mingainō ante Ao ante gānē pōnente æncæmīnimpa. Edæ iī angainō beyænque mīnitō quēwencæmīnimpa.

<sup>22</sup> Mīnitō, Nāmā incæ oda cædāmaī ingæimpa, ante cædinque Wængonguī nānō angainō ante wīi ōnonque ēñēmīnīnque inte wæætē, Æbānō ante i, ante ēñente cæedāni. <sup>23-24</sup> Waocā nāmā awinca awocawæntaa adinque nāmā ate ate wadæ godinque, Quīnō baī intawo, ante nānō adinca do oda cæte wæcampa. Mānōmaī oda cæte wæcā baī Wængonguī nānō angainō ante nē ēñenganque wīi ēñente cæcā iñōmō tōmengā adobaī oda cæte wæcā

ingampa. <sup>25</sup> Wængonguï nõingä nänö wææ angainö ante nani yewæmongainö ante nē ædæmō cōwē acā guiquēnē tōmengä iñōmō nänö eñēninō ante wīi pōnente badāmaï inte wæætē cōwē eñente cæcä iñinque tōmengä mänōmaï cædinque nänö to-  
quinque cæcampa. Wængonguï nõingä nänö wææ angainö beyænque waocä ñimpo cæte quēwengä ingampa.

<sup>26</sup> Wængonguï ingante botö nē eñente cæbo ïmopa, ante pōnengä incæte tōmengä önonguēnēwa ñä cæguēnēwate bai cædāmaï inte wæætē wīwa tedecä iñinque tōmengä nämä incæ oda cæte gob-  
aingampa. Ayæ Wængonguï ingante botö eñente cæbo ïmopa, ante tōmengä nänö änö ante önonque angä ïmaingampa. <sup>27</sup> Nōwadāni tönö owæmpoināni nani wæwēñedē mönō tōmēnāni tönö godongāmæ cæcæïmpa. Ayæ adobaï ïmæcaque ante quēwēnāni nani wēnæ wēnæ cædimāmo bai mönō, Wen-  
tamō badāmaï ingæïmpa, ante wææ cæcæïmpa. Mänōmaï cæmō iñinque mönō Mæmpo Wængonguï ayongante mönō wapiticæ cædāmaï inte wæætē nō eñente cæmō ïmopa.

## 2

*Wacä ingante wadö wadö ate pōnente cædāmaï ingæïmpa*

<sup>1</sup> Botö tōñiñamini eñēedāni. Mönō Awēnē Itota Codito ñäö emonte nē apäigaingä ingante nē pōnēmīni inte waodāni inānite wadö wadö ate pōnente cædāmaï ïedāni. <sup>2</sup> ïïmaï nani cæbaï ante önōwēnenque pōnēedāni. Edæ onguïñængä nē eacä iñōmō tōmengä nänö önongompo timpoi oodo badöi wempocä iñinque waëmoncoo mongængä inte mīni

a ongöñömö guii pongampa. Ayæ onguĩñængä nē wīi eyepæ ēacā iñömö pedæncoo mongængä inte mīni a ongöñömö adobaĩ pongampa. <sup>3</sup> Adinque mīnitö waëmoncoo mongængä ingante, “Bitö iñömö waa tæ contaĩmpaa tæ contaē,” ante apænemīni imīnitawo. Wæætē wīi eyepæ ēacā ingante, “Bitö māniñömö adiyæ ongöe. Botö önöwa iñömö tepataa tæ contaē,” ante apænemīni imīnitawo. <sup>4</sup> Mänömaĩ apænedinque mīnitö weca wīi godongämæ wadö wadö ate pönente cæbaĩmīnitawo. Ayæ wænæ wænæ pönēninque apænte ämīni babaĩmīnitawo.

<sup>5</sup> Botö nē waadete tōniñamīni ēñēedāni. Wængonguĩ Awēnē Odeye ingante nē waadedāni inānite tōmengä, Botö pönö cæbo ate mīnitö botö nempo cōwē quēwencæmīnĩmpa, angacāĩmpa. Imæca quēwēnāni weca māincoo wīi eyepæ ēadāni iñönānite tōmengä, Mīni wede pönēnō nangui ēwocadinque mīnitö botö angainö baĩ botö nempo quēwencæmīnĩmpa, ante tōmēnāni inānite wīi apænte ængantawo. <sup>6</sup> Mīnitö wæætē wīi eyepæ ēacā ingante piĩnte tēdemīni ate tōmengä guingo imonte badingä ingampa. Iñæmpa nē ēadāni guiquēnē mīnitö imīnite nāni wænæ wænæ cædinö beyænque wīi wæmīnitawo. Ayæ adodāni mīnitö imīnite apænte anguināni weca godoncæte ante wīi ænte godānitawo. <sup>7</sup> Ayæ mīnitö, Coditoidi imōnipa, ante Codito waa pōni emōwo ante emōmīni iñōmīnite tōmēnāni adodāni incæ māniwo ante babæ āninque nē wænæ wænæ ānāni wīi inānitawo.

<sup>8</sup> Wængonguĩ angä ēñēninque nāni yewæmongainö ante adinque mīnitö waa pōni Awēnē nānō wææ angainö ante nō ēñente

cæmīni īinque waa cæbaīmīni īmīnīpa. Īīmaī ante yewæmonte impa. “Bitō nāmā ante pōnente, Nāmā waadebo īmopa, ante nāmā bitō waadete pōnenganca wadāni īnānite adoganca waadete pōnēe.” <sup>9</sup> Mānōmaī cædinque mīnitō māincoo ēacā ingante waa cæmīni incæte wīī eyepæ ēacā ingante wadō wadō ate pōnēmīni inte wīwa āmīni īinque wēnæ wēnæ cæmīni īmaīmīnīpa. Ayæ Wængonguī nānō wææ angainō ōnonque wido cæte bai cædimīni inte mīnitō wentamō mongæmīni īmaīmīnīpa. <sup>10</sup> Wængonguī beyæ Mōitee wodi nānō wææ yewæmongainō ante tōmānō ante æcāmenque nē ēñente cæcā incæte mānīnō adodunque pōnī incæ ēñēnāmaī cæcā inte tōmengā mānīnō tōmānō ante ōnonque wido cæte bai cædingā inte wentamō mongængā ingampa. <sup>11</sup> Edæ Wængonguī, “Nānōogæ īnāmaī īñongante godō guēa mōnāmaī īedāni,” ante nē angaingā inte tōmengā adocā godōmenque īīmaī angacāimpa, “Wacā ingā wænōnāmaī īedāni.” Mīnitō wacā nānōogæ īñongante godō guēa mōnāmaī īmīni incæte wacā ingante wænōmīni īinque mīnitō Wængonguī nānō wææ angainō ōnonque wido cæte bai cædimīni inte wentamō mongæmīni īmaīmīnīpa.

<sup>12</sup> Wængonguī nānō apænte anguīōnæ mōnō īmonte tōmengā nānō wææ angainō bai cæcæcāimpa. Mānīnō nānō wææ angainō beyænque waocā ñimpo cæte quēwengā ingampa. Īinque mīnitō tedemīni incæ cæmīni incæ, Cōwē mānōmaī impa, ante pōnēinque tedecæmīnīpa. Adobai ante cæcæmīnīpa. <sup>13</sup> Wadāni wæwēnāni īñōnānite æcāmenque wīī waadete godō waa

cædingä ingää, ante Wængonguī wæætē tōmengä ingante godō waadete waa cædāmaī inte apænte äninque pancæcäimpa. Wadäni wæwënäni İnänite æcāmenque guiquēnē nē godō waadete waa cædingä İñongante Wængonguī wæætē tōmengä ingante nänō apænte anguiönæ godō waadete waa cæcæcäimpa.

*Wængonguī ingante pönëninque mönō cæquēnēnō*

<sup>14</sup> Botō tōniñamīni ēñeedäni. Waocä, Botō Wængonguī ingante wede pönëmo İmopa, angä incæte tōmengä nänō waa cædinō wæætē dæ ä İninque tōmengä mäninō, Wede pönëmopa, ante nänō änō beyænque ædō cæte wænāmaī quëwenguingää. <sup>15</sup> İimaī nāni cæbaī ante önöwënenque pönëedäni. Wængonguī ingante wede pönengä İñömō onguiñængä incæ onquiyængä incæ æcāmenque incæ tōmengä weocoo tönō cænguī ömaacä ingampa, <sup>16</sup> adinque mīnitō weca adocanque tōmengä ingante, “Waa goe, ämopa. Bitō, Yoguidāmaī, ante weocoo wëñae, cænguī eyepæ æninque cæe,” ante angä incæte nē ömaacä nänō ænguēnēnō ante edæ tōmengä ingante godönāmaī İninque tōmengä waa cæcantawogaa. <sup>17</sup> Adobaī İimaī İmpa. Mönō waa cædinō dæ ä İninque Wængonguī ingante mönō wede pönënō incæ önonque bapa.

<sup>18</sup> Incæte wacä İimaī anguingä. “Bitō Wængonguī ingante tōmëmi wede pönënō ëabi İmipa. Botō guiquēnē tōmëmo waa cædinō ëabo İmopa,” ante añongä botō wæætē, Bitō nē cædāmaī İnōmi inte Wængonguī ingante bitō wede pönënō ante botō İmote ödömōmi aboe, ämopa. Ödömōmi adinque



botō guiquēnē botō cædinō ante odömōmo adinque bitō wæætē botō wede pōnēnō edonque pōnī abaïmipa. <sup>19</sup> Wængonguī nāwangā adocanque ingaingā ingampa. Bitō mǎnōmainō ante pōnēmi inte waa pōnī pōnēmi ïmipa. Wēnæidi diyæ adodō ante pōnēnānīpa tōō. Incæte ancai guñente do do wāate wædānīpa. <sup>20</sup> Bitō mǎnōmainō ante nē ōnonque tede bi ïmi ēñēe. Botō, Mōnō waa cædāmaï ïmō ïnīnque Wængonguī ingante mōnō wede pōnēnō incæ ōnonque ïmaïmpa, ante odömōmo ate bitō edæ Ao ante ēñenguïmiyaa. <sup>21</sup> Edæ mōnō docā Abadāō wodi Wængonguī nānō āmaï cædinque tōmēngā wēngā onguīnængā Itæca ingante ænīnque iya tāïmoga cōnōnīnque wænoncæ cæyongante Wængonguī adinque, Bitō nō cæte entawēmi āmopa, ante apænegacāïmpa. Abadāō wodi nānō cædinō beyænque Wængonguī mǎnōmaï angacāïmpa. <sup>22</sup> Bitō ēñēnāmaï ïmitawo. Abadāō wodi edæ Wængonguī ingante wede pōnēnīnque ēñente cægacāïmpa. Wīï ēñente cægaingā inte bai tōmēngā Wængonguī ingante nānō wede pōnēngainō ōnonque pōnēmaingā incægacāïmpa. Ayæ waa nānō cægainō beyæ Abadāō wodi nānō wede pōnēngainō eyepæ pōnī bagatīmpa. <sup>23</sup> Wængonguī angā ēñente nāni yewæmōngainō bai ïnīnque batīmpa. ïïmaï ante ïmpa. “Abadāō ïñōmō Wængonguī, Botō ïïmaï pōnō cæcæboïmpa, ante nānō angainō ante pōnēngacāïmpa. ïnīnque Wængonguī, Mǎnōmaï pōnēmi beyæ bitō botō ayōmo nō cæte entawēmi ïmipa,” ante tōmēngā ingante wæætē pōnō angacāïmpa. Ayæ Abadāō, Wængonguī æmigo ingampa, ante angadānīmpa.

24 Bitō ēñēnāmaī īmitawo. Waocä Wængonguī ingante wīī nānō wede pōnēnō beyænque wæætē, Tōmengä æbānō waa cæcää, ante adinque Wængonguī tōmengä ingante, Bitō nō cæte entawēmi abopa, ante cæcä ingampa. 25 Idægoidi, Ömæ awēmō ate pōeda, ante mēnaa īnate da godōnāni gote pōñōnate Adacaba wodi nē towente quēwengä incæ, Botō oncōnē guieda, ante tōmēna īnate wē wodongacäimpa. Ayæ, Wadāni tōmēna īnate bæi ongōnāmaī incädānimpa, ante, Wadō taadō goeda, ante da godongä gogadaimpa. Mānōmaī cæcä adinque Wængonguī, Bitō cædinō beyænque bitō botō ayōmo nō cæte entawēmi īmipa, ante Adacaba ingante adobainō ante pōnō angacäimpa. 26 Mōnō baō ömæwocä inte do wænte ī bai Wængonguī ingante mōnō waa cädāmaī wede pōnēnō adobai do wæningä bai inte edæ önonque impa.

### 3

#### *Mōnō önonquēnēwa*

1 Botō tōññamīni ēñēedāni. Minitō weca wīī tæiyænāni, Nē odōmonte apænemōni bacæmōnimpa, ante bāinente wæquēnēnāni incädānimpa. Edæ wadāni inānite pōnōmenque apænte āninque Wængonguī wæætē mōnō nē odōmonte apænemō īñōmonte, Æbānō odōmonte apænemīni, ante mōnō īmonte godōmenque apænte āninque pancæcäimpa. Minitō do ēñēmīnipa. 2 Mōnō tōmāmō nanguī ægodawate tæi go wæninque bai oda cæmō īmompā. Nē tedecä īñōmō tōmengä, Æbānō ante tedeboo, ante tōmengä

önonguēnēwa cōwē wææ aadinque tōmengä wēnæ wēnæ änāmaī ininque nōingä cæbaingä ingampa. Ayæ wēnæ wēnæ cædāmaī incæboimpa, ante nāmä baonga tōmāo wææ aate quēwēnongä ingampa.

<sup>3</sup> Cabayo mōnō imonte ēñente cæcæcäimpa, ante tæinta badōinta önöne da wēnemō ate, Cabayo baō tōmāñō incæ iñāimæ iñāimæ gocæcäimpa, ante cæmō ininque cabayo do ēñente gocampa.

<sup>4</sup> Iīmañō ante ñænængade wipo ante adobaī ante pōnēdāni. Ñænængade pōni wipo incæ woboyæ nanguī pæmænte gopa incæte wipo nē dadongä nānō cæinēnō bai, Ædōnō dadiimæ ædōnō dadiimæ wiyate goquī, ante guiyä awæmpa inte wiyate cæcä gopa. <sup>5</sup> Ayæ adobaī mōnō baō tōmāo ēñayōmō mōnō önonguēnēwa guiyä enguēnēwamō imompa. Incæte mōnō önonguēnēwa inte tededinque, Mōnō nanguī cæmompā, ante tedewēmompā. Ñænængade pōni ömædē incæ amimō bayedē guiyä gonga beyæ ömædē tōmāo gonga bæcodote bapa. <sup>6</sup> Ayæ mōnō önonguēnēwa adobaī gonga bæcodote bai tedepa. Mōnō baō tōmāo ēñayōmō mōnō önonguēnēwa tōmāo mōnō wīwa tedewenguinque wēnæ wēnæ enguēnēwamō imompa. Waomō incæ māninguēnēwa beyænque mōnō baō tōmāo inte ēñēnāmaī cæmompā. Ayæ gonga wacæ tænōmonte bæcododāni bai ado önonguēnēwa beyæ mōnō quēwenganca tōmanganca wo ewente imompa. Edæ iī gonga tadōmengadænguipodē öñonte ö ænte wacæ tænōmonte bæcodote bai cædinque wēnæ incæ mōnō imonte cæcä beyænque mōnō wīwa tedewēmō imompa.

<sup>7</sup> Babæidi incæ öömä ëadāni incæ tæntæidi

incæ æpænē quēwēnāni incæ quingänöidi  
 incæ tōmänāni inānite waocä, Botö pæpogate  
 cænināni bacæminimpa, ante cæcä ingampa.  
 Waocä doyedē nänö cægai beyænque cænināni  
 bate quēwengadānimpa. <sup>8</sup> Ìñæmpa æcänö, Mönö  
 önonguēnēwa pæpogate bai bacæimpa, ante  
 cædaa edæ dæ angampa. Edæ, Babæidi cōwē  
 incæmönimpa, ante cænināni badāmai ināni  
 bai mönö önonguēnēwa adobai wēnæ wēnæ i  
 inique ædö cæte waa tedemö. Wæætē mönö  
 önonguēnēwa nangui wænguimæ enguēnēwamö  
 bai imompa.

<sup>9</sup> Mäninguēnēwa inte mönö Mæmpo Wængongui  
 ingante, Bitö tæiyæ waemö imidö anguēnē, ante  
 waa apænemompa. Wæætē waodāni Wængongui  
 tōmengä nänö ingai bai nänö nē badongaināni  
 ìñönānite tōmēnāni inānite ante mönö adoguēnēwa  
 inte wēnæ wēnæ apænemompa. <sup>10</sup> Ado önöne  
 incæ wade wade ante mēnea ante apænemompa.  
 Adodeque ante waa impa. Adodeque ante wēnæ  
 wēnæ impa. Botö tōniñamini ēñēdāni. Mäninö  
 bai mönö edæ wii cæquēnēmö ingæimpa. <sup>11</sup> Æpæ  
 tayömö ado tayömö ædö cæte waēmömæ wen-  
 tamömæ äññömonque ta goquimææ. <sup>12</sup> Botö  
 tōniñamini ēñēdāni. Igowæ nāni äwæ incayö  
 odibomö nāni änömö ædö cæte incaquii. Yowewæ  
 incayö iigo mæñeca ædö cæte incaquii. Adobai  
 ado tayömö ædö cæte waēmömæ wentamömæ  
 äññömonque ta goquimææ.

### *Mönö nö ēñēmāmo*

<sup>13</sup> Minitö weca æcänö nö ēñengä ingantawo.  
 Tōmengä iñömö, Nö ēñēmo imopa, ante wadāni

ēñencædānimpa, ante cædinque tōmengä nänö waa quëwënö inte odōmoncæcäimpa. Ayæ tōmengä nō ēñengä incæ, Botö önōmoque imopa, ante pönëninque tōmengä nänö cædinö beyæ odōmongä acædānimpa. <sup>14</sup> Minitö guiquënë wacä quincōo adinque pīinte entawēmīni ayæ nāmanque ante, Mönö ñænæmō badinque waa quëwengäimpa, ante pönente entawēmīni īinque mīnitö nō ēñēmīni incæ, Mönö waa cæmōmpa, ante ædö cæte anguimīnii. Ayæ mänōmaī baī godōmenque entawēmīni īinque nāwangä mīni anguënënö ante edæ Baa änāmaī iedāni. <sup>15</sup> Mäninö ēñēmāmo wīī Wængonguī nänö nō ēñēmāmo ī. Wæætē īī inguipogaque ante quëwengä inte waocä mā pönëninque wënæ nänö ēñēmāmo ante entawengä ingampa. <sup>16</sup> Edæ waocä æyedēmē wacä quincōo adinque pīinte entawengä ayæ nāmanque ante, Botö ñænæmo badinque waa quëwencæboimpa, ante pönente entawengä īñömö tōmengä ædö cæte tōingä pönente cæcää. Īñæmpa quīēmē nāni wënæ wënæ cæpāmo ante cæcampa.

<sup>17</sup> Waocä Wængonguī nänö nō ēñēmāmo ante nē entawengä guiquënë waēmö entawengä ingampa. Ayæ wacä ingante cōwē piyænē cæte quëwëngä ingampa. Tōmengä nē waadete pönengä inte wacä ingante waa ēñëngä ingampa. Wacä ingante ēñente cædongä ingampa. Tōmengä, Wæwënāmaī incæbiimpa, ante wacä ingante godö waadete waa cædongä ingampa. Ayæ, Quinö waa inguīī, ante mäninö ante cædongä ingampa. Nē waodāni īnānite wadö wadö ate pönente cædāmaī inte tōmengä nō pönente quëwëngä ingampa.

<sup>18</sup> Wadāni īnānite, Botö piyænē cæcæboimpa, ante

nē cæcā iñōmō tōmengā nānō piyænē cædinō beyæ tōmēmō nē mīnongā baī ingampa. Tōmengā nānō piyænē cædinō beyæ waodāni wæætē, Quīnō nō cæte impa, ante cædāni īnīnque tōmengā edæ amiñayedē tōmēmō tā pete ængā baī incæcāimpa.

## 4

*Inguipoga nāni quīncoo ante pōnēnāmaī incæmōimpa*

<sup>1</sup> Mīni cabo quīnō beyæ ante guēa wæætedō wæætē pīīnīnque wæætē godō wæætē godō ānewēmīnitawo. Mīnitō nāmā wadō wadō mīni cæīnēnō ante entawente guēa cæte quēwēmīni beyænque cōwē godongāmæ mīni pīīnte quēwengūinque īmīnipa tōō. <sup>2</sup> Mīnitō æīnente wæmīni incæte ænāmaī īmīnipa. Īnīnque nē ēacā ingante wænōmīni incæ tōmengā nānō quīncoo ante æīnēmīni incæte mīni æīnēnō, ante ænāmaī īmīnipa. Mānōmaī beyæ mīnitō wæætē godō wæætē godō ānewēnīnque guēa wæætedō wæætē pīīnīnque guēadō guēa cæte quēwēmīni īmīnipa. Mīni ānō ante mīnitō, Pōnōmi æmōnie, ante mīnitō Wængonguī ingante apænedāmaī īmīni inte mīni ænāmaī quēwengūinque impa. <sup>3</sup> Mīnitō Wængonguī ingante mīni ānō ante apænēmīni incæte wænæ wænæ ante pōnēnīnque apænēmīni beyæ ænāmaī īmīnipa. Edæ Wængonguī nānō pōnōnī ænīnque mōnō edæ nāmanque pōnente tote quēwengæīmpa, ante æīnente wæmīni inte ænāmaī īmīnipa tōō.

<sup>4</sup> Waocā nānōogæ ingante wido cæcā baī mīnitō adobaī Wængonguī ingante wido cæmīni īmīnipa. Mīnitō ēñēnāmaī īmīnitawo. Inguipoga nāni quīncoo ante mōnō pōnēnō beyæ mōnō

Wængonguī ingante piinte imompa. Incæte, Inguipoga nāni quincōo ante nē pōnencæboimpa, ante æcānō angā Wængonguī ingante piinte bacæcāimpa. <sup>5</sup> Wængonguī angā ēñēninquē nāni yewæmongainō iīmaī ante ōnonquedō ante intawogaa. “Wængonguī cæcā beyænque mōnō tōmengā Ōnōwoca ingante ēwocate quēwēmō imompa. Īninquē māniwoca mōnō imonte waadete pōnēninquē, Botō imote waadete pōnenguēnēmīni imīnīpa, ante wæætē edæ godō piinte acā ingampa.” <sup>6</sup> Incæte tōmengā mōnō imonte godōmenque waadete pōnō cædinque mōnō tōnō godongāmæ cædongā ingampa. Mānōmaī beyæ Wængonguī angā ēñente nāni yewæmongainō iīmaī ante impa. “Nāmanque ante, Mōnitō gomonga waa cæmōni imōnīpa, ante nē pōnēnāni inānite Wængonguī Baa angampa. Wæætē edæ, Mōnitō ōnōmōnique baī imōnīpa, ante nē ānāni inānite tōmengā pōnō waadete cæcampa.”

<sup>7</sup> Mānōmaī beyæ mīnitō Wængonguī ingante ēñente cæedāni. Wēnæ ingante Baa ante quēwēedāni. Baa āmīni ĩninquē tōmengā nānēnē wodii winōmaingampa. <sup>8</sup> Wængonguī gāmænō pōedāni. Pōmīni ate tōmengā wæætē mīnitō weca poncæcāimpa. Mīnitō wēnæ wēnæ cæmīni inōmīni inte ōnōmpo mempote baī waēmō pōnī quēwēedāni. Ayæ, Wængonguī ingante waadete pōnēmopa, ante āmīni incæ adobaī inguipoga nāni quincōo pōnēmīni inte mīnitō mēnonga ante pōnente quēwēnōmīni imīnīpa. Īninquē edæ mīmō ñā mēnongate baī cædinque tōingā pōnente entawēmīni baedāni. <sup>9</sup> Mīni nāmā wēnæ

wënæ cædinö ante pönëninge mīnitö, Ancaa wæwente awædö, ante wæedäni. Mīnitö Ca ca tote quëwënö ñimpo cædinque Ca ca wædinque edæ wæwente quëwëedäni. <sup>10</sup> Mīnitö incæ, Wënæ wënæ cæmönipa, ante önömönique imönipa, ante Wængonguī ingante añömini tömengä wæætë, Wadäni mīnitö imīnite waa acædänimpa, ante mīnitö imīnite ængö cæte bai cæquiringänö angüenë.

*Mönö tönñacä ingante apænte änämaī incæmöimpa*

<sup>11</sup> Botö tönñamīni ëñeedäni. Mīnitö wacä ingä wacä ingä wënæ wënæ ante apænedämaī iedäni. Æcänö tömengä tönñacä ingantedö ante wënæ wënæ äna ayæ tömengä ingante, Wënæ wënæ cæbipa, ante æcänö apænte äna ina mäningä Wængonguī nänö wææ angainö incæ wënæ wënæ ante apænecampa. Ayæ Wængonguī nänö wææ angainö ante wënæ wënæ impa, ante apænte angampa. Wīi tömengä nänö ëñente cæquinque Wængonguī nänö wææ angainö ante apænte angampa. Wæætë edæ, Mäninö ante në apænte ämo imopa, ante bai cæcampa. <sup>12</sup> Wængonguī tömenganque nänö wææ angainö ante në angaingä ingampa. Mänömaī beyæ tömengä adocanque në apænte anguingä inongäimpa. Adocä pönö cæcä beyænque, Botö æmo beyænque quëwenguīnäni, ante cædongä ingampa. Adobai tömengä apænte angä beyænque, Wadäni wo ewente bacædänimpa, ante cædongä ingampa. Bitö guiquënë në angaimi imipa diyæ wacä ingante apænte angüenëmi imii.

*Baänæ ate cëbänö baquī, ante Wængonguingue ëñengä*



<sup>13</sup> Mīnitō ñowo botō imote eñeedāni. Mīnitō nē iīmaī ante tedemīni imīnipa. “Ñowoönæ incæ baänæ ate incæ mōnitō iī wadāni quēwēñōmō goquīmōni imōnipa, ante māniññōmō godinque adoque wadepo iñonte mōnitō godonte ænguinta æncæte ante cæquīmōni imōnipa,” ante amīni imīnipa. <sup>14</sup> Iñæmpa, Baänæ ate æbänō bacæimpa, ante tōmää eñēnāmaī imīnipa. Cōwē quēwenguīmōmpa diyæ eñenguīmōō. Awæñæcaque owo boguimā nænque tamōninque quingæ dæ ba bai mōnō quēwēnō adobaī do dæ bacæimpa. <sup>15</sup> Mīnitō guiquēnē iīmaī ante anguēnēmīni imīnipa. “Wængonguī Ao angā ininque mōnitō quēwenguīmōni imōnipa. Ayæ Ao angā ininque mōnitō iī waa cæquī cæcæmōnimpa.” <sup>16</sup> Iñæmpa mīnitō, Tōmēmōnique āninque cæcæmōnimpa, ante pōnēninque tedete quēwēnōmīni imīnipa. Mānīnō ante tōmānō wēnæ wēnæ impa. <sup>17</sup> Waocā, Æbänō waa impa, ante eñengā incæte cædāmaī ingā inte māningā wēnæ wēnæ cæcā ingampa.

## 5

### *Māincoo nē ēadāni nāni pōnenguēnēnō*

<sup>1</sup> Mīnitō māincoo nē ēamīni iññōmō ñowo eñeedāni. Mīnitō nanguī Ca ca wæedāni. Edæ, Mōnō caate wæquinque nanguī ingæimpa, ante tedecōninque Ca ca wæcæmīnimpa. <sup>2</sup> Mīnitō māincoo ēadincoo do wote batimpa. Ayæ mīnitō waēmoncoo tōmancoo cayæ ade cænimpa. <sup>3</sup> Mīnitō oodo tōnō padata tæinta to tamōninque bai batimpa. Mānī to tamōni beyæ mīni wēnæ wēnæ cædinō edonque pōni odōmonte ingæimpa. Ayæ quincōomē gonga bæcodōññōmō concædinque æmæwo gonte ba bai

mīnitō īi to tamōnī beyæ mīni baō incæ adobaī æmæwo gonte ba baī bacæimpa. Īnæmpa ĩimæca wodo ĩinque bayedē incæ tōmēmīni māincoo ēadincoo do wote baquincoo gæte da wente cæmīnipææ.

<sup>4</sup> Aedāni. Wadāni edæ tōmēmīni quēwencodencoo cædīnāni ĩñōnānite mīnitō, Paga, ante mīni godonguēnenta pæ gompodinque godōnāmaī ĩmīnitapa. ĩnīnque ænāmaī ĩnāni mīnitō ĩmīnitedō ante pīinte wædinque, Nē ēadāni ĩñōmō, Mōnitō cædīnō beyæ ante dicæ pōnōnāni æntamōniyaa, ante wædōnānimpa. Mōnō Awēnē nē adocanque Tōmāā Cægāingā ĩñōmō nē cædīnāni nāni wædīnō do ēñēningā ingampa. <sup>5</sup> ĩimæca quēwēñedē mīnitō quincoo waēmoncoo tōmancoo mante quēwēmīni ĩnte mīnitō cōwē, Nāmā mōni watapæ tote quēwengæimpa, ante quēwēnīmīni ĩmīnīpa. Waocā nānō wæñongā wænguīōnæ ĩñonte cæningā nānō wænguinque oguīmo pōnī ba baī mīnitō cæningā baī adobaī oguīmo pōnī bamīni ĩmīnitapa tōō. Māñiōnæ edæ do batimpa. <sup>6</sup> Wadāni nō cæte quēwēnāni mīnitō ĩmīnite Baa ānāmaī ĩñōnānite mīnitō ĩñōmō, Mīni pante wæquinque wēnæ wēnæ cædānipa, ante wapiticæ apænte āmīni ĩnte tōmēnāni ĩnānite wæñōmīni wæñānitapa.

*Mōnō ee cæpāmo ayæ Wængonguī ingante mōnō apænedō*

<sup>7</sup> Māñōmaī beyæ botō tōñiñamīni ēñēedāni. Mīnitō mōnō Awēnē nānō ponguinganca ante wæntædāmaī ĩnte ee cæte wānō cōñōedāni. Aedāni, Nē quiyacā tōmēmō wæænte ate onguipo cōñe ba ate, Tā bocate pæquī, ante cōñnæ tedænque ee

ongongampa. Cöönæ tedæ iinque baganca amiña bayedē waemō pōni nānō tōmēmoncoo tā pete gæcæte ante wīi ee ongongantawo. <sup>8</sup> Mōnō Awēnē nānō ponguīōnæ oo pōni impa, ante mīnitō adobaī ee cæte wānō cōnōedāni.

<sup>9</sup> Botō tōniñamīni eñēedāni. Mīnitō wacā ingā wacā ingā wæætedō wææte, Wiwa cæcampa, ante godō ānāmaī iedāni. Mīnitō mǎnōmaī cæmīni iinque Wængonguī wææte mīnitō imīnite apænte ante pāmaingampa. Edæ mōnō Apænte Anguingā oo poncæcāimpa cæmīni. <sup>10</sup> Botō tōniñamīni eñēedāni. Wēenēñedē Wængonguī beyæ nē apænegaināni iñōmō tōmengā emōwo apænedinque wæwēnāni incæte wæntædāmaī inte ee cæte quēwengadānimpa, ante pōnēninque mīnitō tōmēnāni nāni cægāī baī adobaī cæedāni. <sup>11</sup> Wadāni wæwēnāni incæte wæntæye ināmaī inte ee cædāni iinque nāni toquinque impa, ante mōnō pōnēnō ante do eñēmīnipa. Docā Coba wodi iñōmō tōmengā nanguī pōni wæwengā incæte wæntædāmaī inte pīināmaī ingacāimpa. Mǎnīnō ante do eñēnimīni inte ayæ tōmengā nānō wæwēñedē iinque ba ate Wængonguī æbānō tōmengā ingante nanguī godongā ængaingā ingacāimpa, ante adobaī eñēmīnitawo. Edæ waodāni wæwēnāni iñōnānite mōnō Awēnē Wængonguī ædæmō waadete waa cædongā ingampa.

<sup>12</sup> Botō tōniñamīni eñēedāni. Wadō mīni pōnēnō ante pōnōmenque pōnēninque mīnitō iīmaī ante godōmenque pōnēedāni. Mīnitō ānō nāwangā impa, ante wadāni pōnencædānimpa, ante cædinque, Botō ānō nōingā baquīnō anguēnē, ante ānāmaī iedāni. Edæ, Öönæ beyænque imæca beyænque quiēmē

beyænque mönō apænemönō nāwangā baquinō angüenē, ante tömänō ante edæ apænedāmaī ðedāni. Minitō wæætē Ao äinēmini inte “Ao” ante mäninque æedāni. Ayæ mīnitō Baa äinēmini inte “Baa” ante mäninque æedani. Edæ wīi mänōmaī cæmīni ðinque Wængonguī wæætē mīnitō ðimīnite apænte ante pämaingampa.

<sup>13</sup> Minitō wæwēmīni ðinque Wængonguī ingante apænequēnēmīni ðimīnīpa. Minitō watapæ tomīni ðinque Wængonguī ingante, Bitō tæiyæ waēmō ðimidō angüenē, ante ämotamīni ancæmīnīmpa.

<sup>14</sup> Æcänō mīnitō weca wænæ wænæ ðna ðñömō tömengā Codito ingante mīni godongāmæ pönencabo ðñömīnite nē aadāni nāni Picæncabo mīni änāni ðnānite, Pöedāni, ante aa pequēnengā ingampa. Aa pecā pönāni ate tömēnāni Awēnē Itota emōwo ante apænedinque wædænque oguī wapæ æninque nē wænæ wænæ ðnongā ingante oo paacædānīmpa. Ayæ adoyedē wænæ wænæ ðnongā ingante nāni oo paayedē tömengā beyæ ante Wængonguī ingante apænecædānīmpa. <sup>15</sup> Ayæ, Wængonguī ingante apæneyōmonte tömengā eñengampa, ante wede pönēninque apænemō beyænque waocā nē wænæ wænæ ðningā ðncæ edæ gançæ bacæcāīmpa. Wængonguī tömengā ingante pönō cæcā ate waa ba ðñāni ömæmoncæcāīmpa. Ayæ adocā nänō wænæ wænæ cæðinō beyæ wænæ wænæ ðngā ðinque Wængonguī tömengā nänō wænæ wænæ cæðinō adinque ðnīmpo cæcā quēwēmaingampa. <sup>16</sup> Mänōmaī beyæ mīnitō wacā ingante wacā ingante apænedinque, Botō wīwa cæðimo inte wæbopa, ante æedāni. Mänōmaī cæðinque mīnitō, Gançæ bacæmönīmpa, ante wacā

beyæ ante wacä beyæ ante Wængonguï ingante apæneedäni. Waocä nē nō cæte quēwēnongä iñömō Wængonguï ingante apænedinque edæ tæi piñænte apæneçä ingampa. Mäningä nänō apænedō beyænque Wængonguï cæcæcäimpa. <sup>17</sup> Ediya wodi mönō waomō imō bai tömengä adobai ingacäimpa. Incæte tömengä Wængonguï ingante, Cöönæ ämi cædämaï ingæimpa, ante ædæmō apæneçä ate mēa go adoque tæcæ wadepo ganca edæ cöönæ cædämaï ingatimpa. <sup>18</sup> Ayæ ate tömengä, Cöönæ ämi cæcæimpa, ante Wængonguï ingante wæætē apænegacäimpa. Apæneçä ate öönædē inō wææ cöönæ cægatimpa. Cöönæ wææ cæ ate onguipoga tömēmō do tä bocate pægatimpa. <sup>19</sup> Botō tōniñamini ēñeedäni. Minitō weca æcämenque nō taadō oda cæte gocä adinque wacä tömengä ingante ocæ emænte mämongä ponguēnengä ingampa. <sup>20</sup> Iïmaï pönēedäni. Nē wēnæ wēnæ cæcä wapiticæ taadō gocä adinque æcämenque tömengä ingante nō taadō inō ocæ emænte nē mämongä ingää tömengä mämongä beyænque nē wapiticæ gocä iñömō æmæwo nänō wænguēnēnō ñimpo cæte edæ quēwencæcäimpa. Ayæ nanguï pōni nänō wēnæ wēnæ cædinō incæ wadæ cæte ingæimpa, ämopa. Mäninque ante yewæmōmopa.

**Wængonguī nānō Apænegainō**  
**New Testament in Waorani (EC:auc:Waorani)**

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

**Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

9bedab5a-39ff-5163-a35b-8056cbbe8690